

PALAMENTE LE MAIKARABELO A YONA A GO OKAMELA

Tekokgolo ya temokerasi ke maemo ao Palamente e ka netefatsang gore puso ka gale e nna e direla batho. Seno se dirwa ka go nna le maikarabelo a a tseweletseng a go okamela (go ela tlhoko) ga ditiro tsa puso..

Palamente le Dikomiti tsa yona e na le dithata tsa go bitsa mongwe le mongwe kgotsa setheo go tla go naya bopaki kgotsa go tlhagisa ditokomane, le go tla fa pele ga yona go ba begela.

MATLA A MOLAOtheo

- Molaotheo o tlhalosa fa Palamente e na le matla a go okamela maphata otlhe a puso, go tsenyeletsa le tse di kwa maemong a porofense le selegae.

MAIKARABELO A GO OKAMELA KE ENG?

- Maikarabelo a go okamela ke tiro e Molaotheo o e neetseng Palamente go ela tlhoko le go lebelela ditiro tsa puso.
- Fa e okamela, Palamente e tsepamisa mogopolo mo mafelong a a latelang:
 - go tsenngwa tirisong ga melao
 - tiragatso ya ditekanyetsokabo
 - kobamelo e e gagametseng ya melao ya Palamente le Molaotheo
 - tsamaiso e e nonofileng ya mafapha a puso.

GOENG MAIKARABELO A GO OKAMELA A PALAMENTE A LE BOTLHOKWA?

- Ka go okamela ditiro tsa puso, Palamente e kgona go netefatsa gore go neelanwa ka ditirelo go a diragala, gore batho botlhe ba tle ba tshela botshelo jo bo botoka.

PALAMENTE E DIRAGATSA MAIKARABELO A YONA A GO OKAMELA MO TLASE GA MABAKA A A LATELANG

- go kgona go lemoga le go thibela tirisobotlhaswa
- go thibela maitsholo a a seng ka fa molaong le a e seng a semolao mo karolong ya puso
- go sireletsa ditshwanelo le dikgololosego tsa baagi
- go naya puso maikarabelo a go arabela tebang le gore madi a baduela lekgetho a dirisitswe jang
- go dira ditiragatso tsa puso go nna tse di mo mpaananeng le go oketsa tshelo ya batho mo pusong.

BOTLHOKWA JWA MAIKARABELO A GO OKAMELA A DINTLO DI LE PEDI TSA PALAMENTE

- Palamente e na le dintlo di le pedi, e leng :
 - **Kokoano Bosetšhaba** (NA), le
 - **Khansale ya Bosetšhaba ya Diporofense** (NCOP).
- E nngwe le e nngwe e na le karolo e e kgethegileng ya maikarabelo a go okamela e e tshwanetseng go a diragatsa.

Palamente Le Maikarabelo A Yona A Go Okamela

- Molaotheo o tlhalosa gore Kokoano Bosetšhaba e tlhophilwe go emela batho go netefatsa puso ya batho ka batho ka fa tlase ga Molaotheo. E dira seno ka go:
 - netefatsa gore maphata otlhe a khuduthamaga a puso kwa maemong a bosetšhaba a puso a rwele maikarabelo a teng, le tsewelela ka tebelelo mo godimo ga tiro ya go laolo puso ya bosetšhaba.
- **Khansale ya Bosetšhaba ya Diporofense** e emela diporofense go netefatsa gore dikgatlhago tsa diporofense di tsewa tsia mo lephateng la bosetšhaba la puso .
 - Maikarabelo a NCOP ke go okamela mo dikarolong tsa bosetšhaba tsa puso ya porofense le ya selegae.
 - NCOP e ka kopa leloko la Kabinete, modiredi wa puso bosetšhaba kgotsa MEC wa porofense go tsenela kopano ya Khansale kgotsa komiti.

MAIKARABELO A DIKOMITI TSA PALAMENTE

- Dikomiti tsa Palamente di tlhomiwa jaaka didiriso tsa Dintlo go ya ka melawana ya Molaotheo go kgontsha maikarabelo a go okamela le go baya puso leitlho.
- Dikomiti tse ke “batsamaisi bagolo” ba maikarabelo a go okamela le a peomolao ya Palamente.
- Dikomiti di sekaseka molao, ba okamela tiro ya puso, le go dirisana le setšhaba.

- Nngwe ya dintlha tse di botlhokwa go gaisa ya maikarabelo a go okamela ke go sekaseka dipegelo tsa ngwaga le tsa Maphata a Puso le dipegelo tsa Moruni Kakaretso ke dikomiti.
- Go ikaegile ka maikaelelo a go okamela, Komiti e ka nna ya kopa ka dinako dingwe kopano go tswa mo Lephateng la Puso kgotsa go le etela go ka bona mabaka.

MEKGWATSAMAISO YA GO DIRAGATSA MAIKARABELO A GO OKAMELA

a) Diboutu tsa Tekanyetsokabo

- Tona ya Matlotlo o bega diponelopele tsa tekanyetsokabo tebang le ngwaga o o latelang wa ditšhelete, ga mmogo le diboutu tsa tekanyetsokabo tsa lefapha le lengwe le lengwe.
- Palamente e tshwanetse go atlenegisa Tekanyetsokabo.
- Morago ga tlhagiso ya diboutu tsa tekanyetsokabo, Komiti e nngwe le e nngwe e nna le ditheetso le Mafapha a puso a a maleba, moo e diragatsang go okamela teng.
- Seno se dira go bona gore a Mafapha a tseweletse ka maitlamo a bona a ngwaga o o fetileng, le go dirisa madi a baduelalekgetho ka mokgwa o o nepagetseng.

b) Dipotso tse di lebisitsweng go khuduthamaga

- Go botsa puso Dipotso ke nngwe ya mekgwa eo Palamente e rwesang puso ka maikarabelo a go arabela.

- Dipotso tsa molomo kgotsa tse di kwadilweng di ka bodiwa Moporesitente, Motlatsa Moporesitente le Ditona ka ga merero eo ikarabelang mo go yona.
- Nako ya dipotso e neela maloko a Palamente tšhono ya go botsa ditona tsa Puso ka ga dintlha tsa go neelana ka ditirelo, mo boemong jwa makoko a bona a sepolotiki kgotsa batlhophi.

c) Dipuo tse di neelwang ke Maloko

- Ka go dirisa tsamaiso e, Maloko a Palamente a ka neelana ka puo mo Ntlong ka nngwe le nngwe ya dintlha.

d) Kitsiso ya Tshisinyo

- Ka go neelana ka Kitsiso ya Tshisinyo leloko la lekoko la sepolotiki le ka tthagisa dintlha tse go ka ngangisanwang ka tsona mo Palamenteng, ka jalo go ba thusa go diragatsa maikarabelo a bona a go okamela.

e) Dingangisano ka maloko otlhe

- Dingangisano ka maloko otlhe ke tsela e nngwe ya go tthagisa tshedimosetso e e botlhokwa go puso mabapi le mananeo a a rileng a puso kgotsa molao o o tlhokegang go tswetsa neelano ya ditirelo.

f) Tiro ya Bokgaolothopho

- Tiro ya bokgaolothopho e neela Maloko a Palamente tšhono e kgolo ya go diragatsa maikarabelo a go okamela ka bobona.

- Tiro ya kwa bokgaolothopho e neelana ka mokgwa wa tisanommogo e e kitlaneng magareng ga Maloko a Palamente le setšhaba.
- Maloko a na le tiro ya go tsibosa Palamente ka ntlha nngwe le nngwe e e tlhageletseng ka nako ya ditserekganyo tsa jaaka fa go okamela.

O KA NNA LE SEABE JANG

a) Go dira tshwaelo

- Go dira tshwaelo go Komiti ya Palamente ke tsela nngwe ya go dira gore lentswe la gago le utlwagale mo Palamenteng.
- Ka go dira tshwaelo, o na le tšhono ya go tlotlheletsa dikakanyo tsa Maloko a Komiti ba ba sekasekang karolo e e rileng ya molao kakangwa pele e ka nna molao.

b) Phethišene

- Moagi mongwe le mongwe o na le tshwanelo ya go dira phethišene go Palamente, jaaka e neetswe mo Molaotheong.
- Motho mongwe le mongwe, setlhopho sa batho kgotsa mokgatlho o ka dira phethišene go Palamente.
- Phethišene ke kopo ya semmuso go bolaodi go tsaya kgato. E ka nna mo sebopegong sa gongwe topo, kopo ya go direlana molemo, kgotsa go phosolola ngongorego.



PARLIAMENT
OF THE REPUBLIC OF SOUTH AFRICA

Produced by the Public Education Office • Parliamentary Communication Services • INSPIRED BY PEOPLE
www.parliament.gov.za • P.O. Box 15, Cape Town, 8000 • Telephone: (021) 403 3341 • Facsimile: (021) 403 3303



PARLIAMENT
OF THE REPUBLIC OF SOUTH AFRICA



Palamente Le Maikarabelo A Yona A Go Okamela

Palamente Le Maikarabelo A Yona A Go Okamela